

吊路庄傳奇 黃啟晉

百過年前，在長治个吊路庄項，單淨一个黃屋人家歇在該片（後來也有人喊著單庄仔、單座屋）。黃屋人家討欸一個麟洛庄个心白，佢安到阿林妹。該下屋下盡苦，佢兩公婆還無享受到結婚个快樂，就愛無閒搵手屋下个事頭。除欸婦人家愛做个屋下事，還愛到圳溝脣个田坵放牛耕田。雖然日仔過欸盡苦，屋下人因為阿林妹煞猛勤勞个精神，家官家娘也盡惜佢，佢老公阿鳳當然也惜佢惜到心肝肚，故所屋下人也過个盡暢樂。

有一日，阿林妹本共樣牽等牛仔去耕田，行到半路時，忽然間看到芎蕉樹下有一頭芋仔葉緊向地泥啄無停。阿林妹無想麼个，繼續做厥田坵事，等到臨暗就歸去。第二日再來耕田時，又本本看到該頭芋仔緊啄地，阿林妹開始感覺無麼著，因為這兩日日頭盡烈，無風又無雨，也無其他个人物對該行過，芋仔葉嘎動毋停。毋過阿林妹又也愛無閒掌牛，故所又毋搭佢，繼續做厥田坵事。等到第三日阿林妹來到田坵，看到該頭芋仔又共樣在芎蕉樹底下緊啄地，阿林妹好奇又心驚驚蓋細義欸行到芋仔脣，用鑿頭同芋仔啄地个地方挖開，嘴角還緊唸等：「田坵眾神，阿妹盡想了解這有麼个東西，係失著你等，請你等見諒！」挖呀挖，挖著一个硬澄澄个大布袋，打開一看，係幾下塊重鈹鈹个黃金。講也奇怪，等到阿林妹同黃金拗項來个時節，芋仔葉就恬下來無停動欸！阿林妹同這一大袋黃金筴到牛背項行歸去，屋下人看到這兜黃金都盡暢樂，想係上天知佢等盡煞猛打拚，故所送兜黃金分佢等，日仔正開始好過，過後黃屋變成該下長

治第二大个有口人家。

阿林妹係麼人？佢係偈阿太啦！以上故事，係偈聽吾爸講欸。其實根本就無黃金，毋過阿太掌牛耕田係真欸！屋下該下會有口，其實係阿太佢兩公婆煞猛打拚出來个。阿太還細時頭腦就蓋好，毋過該下哪有麼个錢分佢讀書，又係細妹欸，故所佢十歲時就嫁到偈黃屋做心白仔。勤儉煞猛个阿太，也會搵手田坵事，又同賺到个錢貯起來，再去同人買田來耕，每日做到兩頭烏，歸來又愛顧屋下个老嫩大細，實在有辛苦。毋過佢兩公婆也盡少怨嘆，慢慢欸屋下个環境也越來越好，到最尾自家做地主，同田坵贖分別人耕，變成該下長治第二个大戶，一直傳到偈讀小學，偈先生有時在上課時，還會講到偈等屋下該下个風光。

吾屋下个堂下有兩副用花崗石刻个對聯：「成功須努力慇心天不負勤勞，到處可為家莫謂小村無事業。」成功个路，係偈等做人一步一步行出來个，相信毋管在哪位，堵著異困難个事情，自家係有心，實實在在个打拚，就定著會有成功个一日。吾公太煞猛打拚个精神，深深刻印在偈心肚，永久難忘。

~~ 作者為屏東縣育英國小教師 ~~